



4
21

十洲詩鈔


二十五、二十六

卷二十五、二十六

始



4-24



大正癸亥歲離

十洲詩鈔

細川氏藏板

天正
4.16
内交

十洲詩鈔卷二十五

細川潤潤叟 著

七月二十三日、過那須園、八月一日歸家、留中
得八律、

避客何須更掩門、誰能訪我到孤村、蟬嘶太聒林過
密、魚躍如狂水半渾、偃臥看書宜引睡、逍遙覓句便
忘言、
三 殮一浴消長夏、夏日雖長恨易昏、

偶入村莊過一旬、官身無復簿書塵、閑行不覺吞清
氣、默坐何須嚙玉津、得此園池深自愛、與他魚鳥更
相親、莫言樹石渾如故、夕晦晨明日日新、



蕭條村巷有柴扉、綠樹陰中避暑威、偶免鞭苔牛始
健、暫離唧動馬方肥、揩眸睡起臨池坐、摩腹飯餘巡
圃歸、知否老人酬荅懶、親朋書札寄來稀、
池光瀲灩滌煩襟、睡起下階尤快心、新竹玲瓏圍一
尺、穉松森挺勢千尋、林陰土濕菌爭茁、石上紋斑苔
半侵、竟日亂蟬聲不斷、依稀似我掉頭吟、
日午晴天有殷雷、須臾峰頂亂雲堆、千村漠漠墟烟
滅、萬樹蕭蕭山雨來、豈得此中留毒暑、可從何處著
塵埃、東京聞說今猶旱、喝死人多寔可哀、
休言陋室僅三間、清福元來造物慳、野飯畦蔬農共

樂、芒鞋竹杖我方閒、曉空突兀溫泉嶽、暮色混茫鹽
谷山、處處浴場皆熱鬧、豈如于此掩柴關、
操作從晨至點燈、家僮渾不怕炎蒸、楓多病葉須除
蠹、檜有枯枝要解藤、換板架池橋已朽、添泥補土岸
將崩、治園久慣粧風景、驅使汝曹吾亦能、
汝曹切勿失天時、只視四隣人所爲、瓜蔓未伸旋設
架、笋芽猶嫩便編籬、今方養稻宜施糞、已了採茶須
剪枝、欲傲前賢僮約例、庶幾三復一篇詩、

又得三絕

連疇稻葉綠搖風、數斛顰牙在此中、寄語佃人宜努

力吾將爲汝禱年豐、

午天無奈此炎蒸、飯罷南窓欲枕肱、居士殺生寧得已、手揮白拂打蒼蠅、

繞宇蛛絲映夕曛、不知能縛幾多蚊、恢恢湯網吾何恃、下策火攻尤策勳、

七月三十日、值先帝二週年祭、此日熱甚、祭官之勞可想也、乃作此篇、

壬子七月三十日、先帝實以此日崩、欲攀龍髯攀不得、吞聲而哭、記吾曾今年正值二週祭、祭官祭服上御陵、行行揮淚且揮汗、赫赫驕陽熱若蒸、我告

諸公善努力、區區寒暑不難勝、誠思先帝神武蹟、威風凜凜凜于冰、

八月八日、卽陰曆六月十七日、是日立秋、時久早熱甚、是歲五月閏、句中故及、

大地洪爐似、誰將烈火烘、閏年多夏月、早歲少秋風、人絕雲霓望、天忘雨露功、可知時序換、唯在曆書中、十三日、大雨、雨後頓涼、

夜雨洗秋暑、幽人喜可知、曉風初過處、晨露未乾時、簷竹森森立、盆花裊裊垂、園丁來報我、畦菜有餘滋、雨後過浯園

雨歇高梧噪晚蛩、滿池新漲綠搖搖、茅軒低伏觀魚
檻、草徑斜通待月橋、灑氣應從林外透、殘炎欲入水
中消、惜無一隻瓜皮艇、催喚家僮撥短橈

二十三日、宣戰詔下、

要地如肥肉、狺狺餓虎爭、奪攘非實力、租借只空名、
欲據同盟誼、俱追隣境兵、膠州灣外水、勿使逸蛟鯨、

暑夕、二首、

回頭何處有涼颺、月似銅鉦挂樹枝、勿怪草間多著
露、家僮澆水未乾時、

節屆中元暑未收、柳梢聞斷暮蟬稠、須臾月色明如

水、濕得蜚聲僅似秋、

筆墨舖有紫雲石硯、蓋產于福島縣山中、試之
與端硯相似、購以備几案、以詩寵之、二首、

良工磨美璞、作我筆耕田、硯史何曾載、銘辭孰復鐫、
摩挲留手澤、愛護付家傳、勿道新坑石、藏山幾萬年、
佳硯如名士、出於巖穴中、切磋猶厚重、拂拭更玲瓏、
地濕毫難禿、池寬墨易豐、吾將新作譜、繼躅石希聰、

石希聰著、
和漢硯譜、

九月十日夜、大雨、

西風送雨雨如繩、飛沫穿窗欲滅燈、多謝龍君洗秋

熱更將餘力掃蚊蠅、

有感時事

由來天道有虧盈、人世榮枯與歲更、當局方耽盧白
戲、傍觀空憫觸蠻爭、須知殺戮爲凶事、不似文明得
美名、四面隣邦多勁敵、抗顏猶詡國皆兵、

活園卽事

馬跡車聲隔枳籬、數椽茅舍枕淪漪、坐觀稼熟秋尤
好、臥聽泉流夏亦宜、花圃接吟栽藥圃、荷池分水養
魚池、此間幽賞無人共、惜不親朋豫訂期、

日田人某贈剪紙刀、刀以象牙造、作蕉葉形、謂

田竹田舊物、歸於長三洲、又歸於僧五岳而某
得之、

一片象牙如篋子、有時爲用勝吹毛、才鋒慧劍宜微
鈍、豈啻文房剪紙刀、

夜聞蟲聲二首

不怨秋蟲近枕邊、聲聲好伴老人眠、如非點點夜窗
雨、便是涓涓春澗泉、

松蟲鈴蟲馬脚蟲、個個吟聲今古同、底事詩人無本
領、唐音宋調競時風、

十月、聞我兵逼青島有作、

壯士隨軍氣益豪，櫛風沐雨不言勞。義兵鼓譟從天下，窮寇倉皇無所逃。要向萬邦開港埠，豈容一國設城壕。草間狐兔何須殺，却恐腥羶汙寶刀。

街上所見

秋風連夜滿街衢，掃去飛蚊一個無。戶戶樓欄多日色，今朝齊曝碧紗幮。

喜多橘園有中秋詩，即用其韻却寄

重逢良夜太凄然，空憶頻年醉綺筵。簌簌陰風方過樹，昏昏殺氣欲冲天。白都守將寧遑息，青嶋戍兵應不眠。況復國喪懷抱惡，月光誰解賞嬋娟。

十月二十七日，值陰曆重陽節日之廢久矣。此日與常日無異，有感而作。

登高孰復醉重陽，空憶龍山落帽狂。素欲閉門兼種菜，尤宜掃地且燒香。置身全似不材木，搜句尙餘無盡藏。多謝化工於我厚，催開籬菊作年光。

夜賦

卷自手中落，衾裯暖漸增。詩情方散渙，睡思已瞢騰。倦枕愁聞雨，昏眸怯見燈。斷鴻何處叫，莫是避飛矰。

夜歸

露氣沾沙路，通衢塵不颺。幸逢天似鏡，喜見月如霜。

橋影橫江直，燈光墮水長。車行宜顧盼，緩緩亦何妨。
豐年歌
聖皇御世無凶年，年年斗米價千錢。人口蕃庶穀不
給，穀貴未失歲功全。今年五風又十雨，四野黃雲遠
接天。上熟如此未曾有，陋巷窮居多爨煙。凡物不少
則不貴，穀賤傷農亦當然。救之宜設常平倉，官家豈
無糶糴權。

近郊晚步

好晴召我出門游，日暮行吟未肯休。孰謂投林追宿
鳥，吾將避路讓歸牛。煙中何處碓聲急，草際那邊葦

語稠，點點遠鴻堪目送，不須更去上高樓。

夜不能寐

霜氣穿窗夢數驚，強思詩句亦難成。衰翁却羨司晨
鳥，睡過一宵方始鳴。

十一月二十二日，同一之助源二郎，游衣笠村
過滿昌寺、三浦義明香花院也。寺後山有義明
墓，又有祠堂，藏其木像，爲賦二絕。

兵馬誰持奕世權，不如且結後來緣。湘山有個香花
院，暮梵晨鐘八百年。
鵲鶴原上棣華萎，右將忌猜人所知。却是舊恩忘不

得空山來問義明碑

義明十七年忌辰、源賴朝來此祭墓、事見東鑑、

凱旋

壯士羣羣唱凱歌、膠州灣上止干戈、深閨少婦羅巾濕、有不歸人入夢多、

夙興

夙興何肯待晨炊、枕上殘燈未滅時、急拭昏眸書數字、怕吾忘却夢中詩、

晏起

一點書燈薄暈生、寒光欲盡紙窗明、隣雞三唱猶慵起、臥聽鴉聲與雀聲、

夜賦

一穗寒燈在枕邊、側身猶欲閱青編、祇愁隻手不伸得、才出衾窩便指卷、

又

視力怕過用、燈下廢簡編、飯後亡幾臥、雖臥未輒眠、閉目強思句、有句亦難圓、夜夜率如此、近詩多短篇、

題小杜停車圖

陶菊林梅孰不知、古來高士例能詩、一從秋色逢吟賞、紅葉終歸杜牧之、

乙卯新年、二首、

禁林雲散曙光催，日出宮門蕩蕩開。太息新年朝賀廢，不披官服已三回。

吩咐樵青汲井華，新年吾欲啜新芽。一壺昨日蒙宣賜，赤坂離宮御苑茶。

三嶋中洲，寄示論學絕句三百首，賦此却寄四首。

壯時親炙拙堂翁，老去群書無不窮。經話一篇千萬語，在斯二十八言中。

中外古今諸聖賢，家家神髓入新篇。欽君詩境無邊際，孔孟老莊仙佛祇。

沈酣咀嚼得真詮，信筆寫來三百篇。便是一家新格

調，何曾摹倣老詩禪。

梁川星巖所著春雷餘響，與此詩相似。

學海茫茫孰問津，漫然弄筆又搖唇。春雷餘響遺音在，能聳聞根者幾人。

新年病痢止酒三首。

醫師戒我酒杯停，耿耿長宵不易暝。知否老人常少睡，假饒帶醉暫時醒。

甘將湯液當香醪，八十衰翁病骨高。蚤歲粗豪貪痛飲，從今祇合讀離騷。

暫停杯酒亦陶然，只苦衰翁少睡眠。每夜思詩才遣

况不妨哦句亦難圓、

庭中有一種木瓜、冬日花開、俗稱寒木瓜、
霜寒凜凜透肌膚、爲憫梅妃色不腴、獨有木瓜花數
點、鮮紅射眼似珊瑚、

病起試步

病起又逢風日新、飯餘準擬過比隣、呼僮拂拭烏藤
杖、挂壁經旬合有塵、

蠟梅三首、

一種梅花花色黃、先春早已漏春光、點酥凝蠟非難
擬、底物染成如許香、

奇葩豈不入吟眸、冷艷惱人人欲愁、孰試宮粧尙羞
澁、含香含意未擡頭、

攢簇綴蜂房、參差著雁行、肌瑩宜淡抹、性潔忌濃粧、
奕奕瞿曇面、芬芬眞臘香、勿言題詠乏、佳句有蘇黃、

偶歎

久聞砲火滿西天、到處塹隍戎幕連、蛟鱗共沈潛水
艇、隼鷹皆避御風船、隣邦孰用調停力、公法空存議
論權、均勢却憂無勝敗、黎元何日得休肩、

二月十四日過吾園、是日陰曆正月元日、

曠隴曦影欲融霜、恰好巾車過別莊、雪後松毛如故

十洲詩錄 卷二十一
綠風前梅蕊不聞香、園中幸有林泉樂、世上莫非名利場、喚取家僮紉花架、早春農事未匆忙、

去歲伐那須園中雜木爲炭、車載入都、禦冬之儲不乏、可喜也、二首、

霜寒夜夜逼人來、熾炭紅爐煖似煨、樸楸此時功却大、未應獨重棟梁材、

孰運烏薪入我門、圍爐笑語對兒孫、斯翁別有防寒術、學得息心心自溫、息心心自溫、陸放翁句也、

論歌、十二首、

一章三復味無窮、吐納自然何覓工、手斬大蛇妖霧

熄、八重垣在八雲中、素蓋烏命

海島同居歷幾時、沙濱葺草誕皇嗣、倡酬辭氣何敦厚、不似當年永別離、謂舉歌

不省聖皇東面征、孰攘螳斧阻戎行、鏡歌一曲傳千古、徹耳琅琅天語聲、神武天皇

朦朧曉霧欲晴天、佳境吟成衆口傳、參議才情人不會、千秋絕唱屬歌仙、朝霧之篇、當是野篁作、而世人以爲柿本人麿、

古今一集有餘師、日記何妨倣女兒、指摘妍媸示來學、不惟得失寸心知、紀貫之

歌人套語總尋常、三位吟情獨擅場、鍛鍊工夫猶射

藝力能穿孔，巧穿揚源賴政。

將軍遭際實堪悲，數卷永言千古垂。萬葉古風成一格，高華彷彿盛唐詩。源實朝

歌道從來妙不傳，金丹換骨始成仙。吟情豈有東西別，每誦樂天詩一聯。藤原定家○定家思句，必先誦白詩一聯。

俄逢春雨可如何，駐馬村家思借蓑。棠棣一枝花欲語，勸君發憤學和歌。太田道灌

學力高深孰敢當，縣居著作已盈箱。後人休議文辭古，猶勝徂徠學李王。賀茂真淵

萬斛珠璣咳唾成，不今不古自孤行。平生要作驚人

語，下筆灑然都近情。香川景樹

九重多暇樂風流，文藝君臣互競優。與我先皇宸藻別，萬篇無不為民憂。明治天皇

村莊獨坐

輕煙裊裊出茶甌，兀坐思詩獨掉頭。永晝捲簾人意倦，柳眠花睡弄春柔。

暮春偶成

日氣酣酣透袂衣，好晴如此近來稀。偶然吾欲出門去，何處晚櫻花未飛。

題自畫竹

倦來洗硯墨新磨，欲寫此君驅睡魔，勁節直竿元自足，細枝柔葉不須多。

近日都下賣畫爲活者甚多，其人未講畫理，畫之傳不傳，不可知也。

持嫌乞畫客填門，未識幾年留墨痕，不用功深名不遠，勸君須記退之言，韓愈云，用功深者，其收名也遠。

理園

模山範水散家資，使役園丁我亦疲，豈有閑心及他事，不思行樂不思詩。

新荷

一泓寒碧拭青銅，下有游鱗似有風，出水新荷猶半捲，田田嫩綠帶微紅。

題自畫山水二首

吟餘寫出無聲詩，一幅雲煙只自怡，老婦年來廢膏沐，厭聞衆口說妍媸，槃礴解衣知幾年，未曾矻矻受師傅，青山寫就無人買，只道先生不換錢。

題柳鷺圖

萬絲垂柳拂陂塘，此處春鉏獨享涼，素不知寒安怕暑，滿身將雪作衣裳。

梅天無雨，累日熱甚，忽覺微涼，喜而有作。
旱天日日苦炎埃，下午乍涼真快哉。想是近村新得
雨，滂沱餘勢入風來。

夕過江戶川

兩岸人家枕碧流，晚風過水冷如秋。雙雙蝙蝠騰空
去，楊柳梢頭月一鉤。

聞歐洲戰報有感

昔者東周末，群雄割封疆。秦據崤函固，形勝稱金湯。
東向事攻略，六國莫能當。其兵非不衆，連敗不免亡。
近日歐羅巴，殺氣蔽日光。英佛人善戰，鄂羅陣堂堂。

環攻逾一歲，未見武惟揚。一進又一退，要不過自障。
獨逸與秦似，吞噬真虎狼。其勢利速戰，何怪肆猖狂。
同盟類六國，山海要梯航。連合固不易，攻守只一方。
其勢宜持久，勿厭歲月長。銳意養其力，勿怕獨逸強。
獨逸雖強矣，其強不可常。彈藥縱未盡，行將乏芻糧。

題畫雁

萬禽知節序，木落卽南翔。避繳關山路，含霜煙水鄉。
秋雲千百點，夜月兩三行。豈厭風霜苦，湖田飽稻粱。
剪紅羅，未聞入詩憫而賦之。

群芳一樣享陽和，入夏小園風露多。桔梗莢葵誰不

賞怪無人咏剪紅羅

梅雨中臥病經旬得詩三首

自非方技士、不許入柴關、伸脚藤牀上、游心書卷間、
風搖梧影直、雨漬蘚痕斑、天意憐吾老、教因病得閑、
人性非金石、時時末疾嬰、祇須安枕簟、併又解簪纓、
倚壁孤筇挂、當階雙屐橫、學仙無所得、長睡送餘生、
養病何妨懶、有如粘壁蝸、書來兒代筆、土燥僕澆花、
節食糜猶飽、停杯酒不賒、莫非醫藥效、患狀減些些、

高階瓏仙師、移錫於筑前之安國寺、賦二絕句

送之、

聞君飛錫渡江湖、自此都門道友無、打坐近來將學
靜、笑吾未解半跏趺、

一鉢隨緣西又東、名藍駐錫振家風、滿堂緇素非頑
石、聽講何人不破聾、

偶憶土左松魚事而賦

土左本是水雲鄉、九十九灣連大洋、鮫鱈鯨鯢之所
窟宅、其外鱗族無盡藏、就中鯽魚最美、頭番上市
人傾囊、項鬢腹腴無所擇、膾肉堆盤下箸忙、豆油點
點咽喉潤、蘇葉纖纖齒頰香、此時何人肯彈鋏、一碟
一碟嘗復嘗、調理由來忌一律、同是魚軒更有方、茅

柴傳火烘鮮肉，生熟火候要審詳，待肉已冷始上俎，
聶切巧手煩厨娘，糝鹽灌醢漸淡洽，邊白中紫帶脂
肪，魚氣撲鼻食指動，大嚼祇疑有別腸，用以侑酒酒
無量，乃使人人類渴羌，久矣都門無此物，新鮮風味
不可忘，偶拈吟筆記鄉味，不覺饒涎三尺長。

苦熱二首

廣廈萬間安可施，吾儕欲做少陵詩，儻教車蓋連千
里，得爲行人隔赫曦，
坐臥藜牀又竹牀，夏天無處避驕陽，恨吾池欠瓜皮
艇，艇上涼於庭上涼。

喜雨

午雲來又去，長空翳復晴，夜來黑雲合，白雨勢縱橫，
枕上聞檐雪，恍然飛瀑聲，移牀避屋漏，可知溝澮盈，
曉起開戶牖，草木共向榮，豈翹煙塵淨，加之枕簟清，
暑歛羸軀健，涼扶病體輕，遙想四郊路，喝死者更生，
此雨孰所賜，蒼天近人情，援筆且志喜，賦詩擬亭名。

自七月初末，病痛風，至九月猶未愈。

四大本假合，成壞安有常，况復四百病，來去不可量，
嗟予性多病，早歲親藥囊，于今保殘喘，八十二星霜，
痛風今秋劇，項背如被創，家人聞諸醫，未是致命傷。

轉又反側、呻吟二月強、人世本苦海、萬苦得不賞
九月七日、輓井上侯爵、

井侯曾自死中生、百事唯由斷乃成、欲劃神州爲郡
縣、終將讜議動公卿、理財只要從民力、行政尤憂遠
物情、惜不復臨元老會、銘旌今日向佳城、

盆蘭之花已落、而一莖又將開、喜而有作、

淺黃深紫影交加、慣看經旬已落花、便謂今年芳事
歇、根邊乃有欲抽芽、

園丁排列盆花於齋外、皆凡種也、然亦足慰心
目、不可無詩也、

排列盆花在目前、朱朱白白孰尤妍、病夫何暇品高
下、唯喜佳名老少年、

庭上雜花、自夏至秋、開謝不絕、

小庭不盈畝、斯中貯群芳、個個迭開謝、以助風露涼、
鳳仙及雞頭、同類有青箱、桔梗則淡紫、鹿醬則正黃、
紫苑抽英聳、紅蓼垂穗長、秋色最美者、莫如秋海棠、
其側有拒霜、花發不待霜、彼此相輝映、各自競艷粧、
若夫盆種者、建蘭不斷香、素英有茉莉、朱萼有佛桑、
對之有何好、病苦得暫忘、吾方服湯液、何能舉一觴、
病間閱放翁集、見典衣買紫桂、輟食致紅藥、二

句而憫其貧，如予則未曾爲花損衣食也。賦以自誇。

典衣買紫桂，輟食致紅藥。我讀放翁詩，爲憫福分薄。老夫久臥牀，何以慰寂寞。親朋贈時花，厚意何忍却。一落又一開，可算萬跼。而我於衣食，未曾要節約。

中秋夜，月光入戶，賦詩遣况。

乙卯中秋夜，皓魄輾碧空。卓上陳花菓，觀賞戶戶同。管絃聲不止，詩歌興何窮。須臾樓閣鎖，萬人皆夢中。清輝益晃曜，流汞滿簾櫳。此時誰步月，獨有擊柝翁。十月初，稍有起色。

勿言醫藥總無功，天意如將起老躬。急寄新詩告諸友，從今應署再生翁。

今茲十一月，上幸西京舉大典。余以病不能扈駕，賦詩書感。

今年十一月，西幸百官陪。想見鷓鷯行，劍佩照樓臺。病夫不能扈，老懷何由開。幸叨養老恩，西望且莫哀。八十以上者，遍賜朱髹杯。我當同父老，一醕玉山頽。病中口渴，日喫葡萄止渴，爲賦此詩。

今夏病始發，聯綿已暮秋。百體不聞命，支離若相仇。口吻乏津液，呻吟擁衾裯。不有菓實美，何以潤咽喉。

我居在神田、百菓不難求、四時遠近味、一一上膳羞、
林檎與梨子、果無渣滓不、柑橘非不好、霜前未可收、
此時上市者、馬乳獨甘柔、入口不要嚼、津津瑞露流、
入胃能解熱、全與靈藥侔、助我藥餌力、沈痾當行瘳、
何人傳此種、多謝博望侯、儻不賦此詩、嘉惠何以酬、
夜雨、聞屋漏、不能寐、

承塵聞點滴、密密又踈踈、已捲壁間畫、又移牀上書、
雖同林下鳥、免作水中魚、恨欠網繆計、辛勤韓子廬、
即位禮成、恭賦五首、

齋田新穀熟、車駕向西京、久矣神人合、宜哉祭政

并古今雖異禮、上下共輸誠、豈是嵩呼類、分明萬歲聲、

歡呼聲動地、豈止一人慶、萬姓安耕鑿、群僚競裸將、
山川增氣象、草木帶輝光、聖意猶兢業、倍令皇運昌、

聖皇申大孝、紹述祖宗來、行賞宜增位、爲仁豈惜財、
恤窮頒內帑、養老賜天杯、湯網開三面、恩綸赦青災、
肅穆大嘗祭、永循千古儀、祥飈翻葦箔、瑞露濕柴籬、
拍手供芳饌、擡頭唱祝詞、神人俱有喜、但得近臣知、
天祖威稜凜、駿奔陪帝禋、露濃如灑水、霜淨豈揚塵、

降殿更升殿，迎神復送神，燒殘庭燎火，永夜亦將晨，
寶祚無窮極，何邦不嘆嗟，伶官皆舊族，舞女亦良家，
設奠尤宜腆，頒醕孰謂奢，珍羞猶未足，更賜插頭花，
黑井悌次郎，示紫宸殿瓦硯，言在西京日所獲
也，粹賦一絕，題其匣面，

未央銅雀悉寒煙，幾許陶泓世上傳，借問何由獲斯
瓦，紫宸殿古尙巍然，

十一月二十八日 還幸，二十九日有賢所御
神樂之儀，又有授爵賜金等事，十二月二日閱
兵式，四日觀艦式，七八日宮中夜宴，九日東京

市奉祝會奉請 臨御，於是大禮之儀全畢，再

賦四首

貔虎滿郊原，縹幢蔽海門，燈光皆紫電，旗色悉紅暎，
共仰皇威洽，并知國體尊，不妨忘帝力，何以荅君恩，
聖駕返東京，乃聞神樂聲，大酺連二夜，酣宴至三更，
苟有功勞實，皆蒙恩寵榮，椒房添國慶，皇子此時生，
隆詔分天慶，仲冬和氣暄，寬容何擇物，眷顧特推恩，
戶戶三多頌，家家萬歲旂，下情應上達，鸞輅入公
園，

大禮今方畢，餘歡尙未休，治生須黽勉，處事忌優游，

宜養士風勇，以令我備修。西歐兵火慘，庶不及神州。

題畫山水二首

嵐翠排窓入，石泉循檻流。山人忙應接，勿謂乏交游。
山人愛住山，茅屋兩三間。何事門前水，濺濺去不還。

咏香

不分雞舌與龍涎，一穗搖風斷又連。我有書香香細
細，要添金鴨腹中煙。

沈香木杖歌

一條數尺削而圓，紋理黃黑質芳堅。言是沈香木之
杖，叩之有聲鏗鏗然。香木自古人所貴，玉堂金鼎吐

篆煙，吾曾聞之漆園叟。山木自寇熹火煎，幸而爲杖
免此厄。奇寶却同樗櫟全，葛陂慎勿化龍去。優游永
伴地行仙。

送黑井梯次郎以馬公要塞司令官赴任

澎湖島上旭旗翻，瑞氣氤氳滿塞垣。醃肉生時君勿
嘆，手持鎖鑰守西門。

丙辰新年

都門到處簇祥煙，滿地車聲上徹天。借問海西諸大
國，有何情緒樂新年。

去冬賜嵌寶花瓶一對，以賞校書之勞。新年插

天燭數枝、朱實璀璨、與釉色相映、喜而有作、
老臣近校石渠書、孤陋何能辨魯魚、異數却叨過分
賜、傍觀應笑不虞譽、嵌寶花瓶出御庫、菊章爛爛照
茅廬、花紋釉色兩精絕、良工苦心果何如、汲得井華
何以插、水仙歟將寒菊歟、水仙寒菊俱小草、比之瓶
製太蕭疎、天燭數朶枝葉茂、朱實孔陽嚴霜餘、火齊
珊瑚紛滿目、忽覺寒酸氣味除、

二月七日雪

改歲每朝晴且暄、何來雪片逐風翻、窓前看失松篁
色、路上漸無車馬喧、喚婦開筐尋紙襖、教兒買肉脩

匏樽、一家要享團樂樂、不待親朋來叩門、

十三日、過源次郎僑居、

望見阿翁喜欲顛、孫男孫女滿燈前、就中幼者猶羞
澁、却步藏身阿母肩、

次日、命車觀木古庭懸泉、

陰崖陰氣未堅凝、夏玉聲聲水若繩、孰認晃山飛瀑
壯、寒天化作一條冰、

衣笠村、見梅正盛開、二首、

寂寞野人籬落中、香風掩冉色玲瓏、青邱爲汝留住佳
句、回首名園盡棘叢、結用青邱全句

野梅踈影最橫斜，非是孤山處士家，却笑詩人徒自苦，年年收子不看花。

用林通故事

造船廠

新營船廠造新船，辛苦鳩工五十年，常恨國防多缺陷，須期兵備最完全，鑿渠地下低無水，架鐵空中遠帶煙，海外戰塵飛不到，春波渺渺白鷗眠。

曉雪

未聽都人喜雪花，歎呼祇合遍農家，帳中誰飲羊羔酒，爐上吾烹菟道茶，竹折有聲飛玉屑，車行無響輾銀沙，須臾變滅難收拾，羨殺當年溫八叉。

讚岐綾歌郡府中村鼓岡，有崇德天皇行宮故址，近日村人建碑表之，寄圖索詩，按圖岡北十步有內裏泉，蓋供御膳之水也，專咏其事以寄焉。

一派猶稱內裏泉，澄清如鏡鏡光圓，斯中恐有龍顏影，寄語轆轤休妄牽。

阿波板野郡堀江村，有土御門天皇行宮故址，村人索詩。

故宮形勢尚依然，父老永悲承久年，九世陪臣留府址，荒涼今日有誰憐。

宸藻篇篇麗似花，藤家極口賞詞華。永言元是緒餘耳，雖即專門莫以加。

天皇以御製百首示藤原定家，令加評隲，今所傳中院百首即是。

近日販贗書畫者甚多，以詩戒人，三首。

審知真贗亦難哉，敵箒千金勿見哈。玩物孰言唯喪志，殆將蕩盡一家財。

好畫摹來點染工，併看縑素與真同。牙郎套語君須記，出自故家筐篋中。

一幅丹青索價高，明知時史自揮毫。近來新畫還多利，無乃門生輩捉刀。

三月十七日夜、雷後雪、賦詩紀異。

陰翳欲晴不得晴，日光欲明不得明。雲葉翩翩來又去，微風忽止暮寒生。入夜滿天雲氣重，霹靂貫耳兩三聲。已而雨來霰又雪，滿地皎然誰不驚。屈指已近春分節，冬春氣候自此別。一寒一暖本無常，何怪有雨又有雪。况復春雷非冬雷，雷公行雨雨凝結。爲寒所勒不得融，密密踈踈飛玉屑。明知天變不足恤，欲傳異事聊走筆。詳記歲月永不忘，丙辰三月十七日。吾園有一種梅花白而紅間之，以詩紀之，二首。梅花紅白共玲瓏，會與源平旗色同。恰似美人粧就後，更添唇上一痕紅。

皎潔梅妃不受汗、胭脂何妨染肌膚、縞衣元是仙禽
色、頂上鮮紅豈可無、

是歲三月源二郎辭官而歸、

少年難久侍親闈、膝下曾嘆笑語稀、可喜家人添數
口、兒曹今日罷官歸、

命園丁、接庭前緋櫻十數本、

一樹緋櫻品最奇、他年怕不免枯萎、今春接得如千
本、欲爲名花廣繼嗣、

池上所見

池上時縱目、春水似羅縠、活水自有源、池平而流速、

春風颯然來、落花散殘馥、池魚逐花行、吾手不能掬、

落花二首

春日少晴日、賞花能幾回、雨狂同欲舞、風勁或如揉、
粉墮溶溶水、香銷漠漠苔、豈唯蜂蝶恨、更使杜鵑哀、
繁華真一夢、顧眄忽蕭條、香雪元難久、暖雲終合消、
入池魚唼喋、匝樹蝶飄飄、勿謾呼臯復、芳魂不可招、

晚春口占

萬株香雪壓樓臺、爭奈此時風雨來、一歲春光吾最
愛、滿林新綠晚櫻開、

書况

迎春未幾送春回、轉眼繁華安在哉、芳草池頭花已落、紫藤棚下燕初來、風前樹杪翻新綠、雨後石皴生嫩苔、永晝蕭齋無一事、昏昏睡思苦相催、

初夏即事

紫桐紅藥漸闌殘、葉底青梅大似丸、昨夜一番新雨過、滿庭風露綠陰寒、

吾園即事二首

吾園不遠在街衢、野趣村風自一區、時喚家僮編細竹、防他猫犬攫鷄雛、

豆莢漸肥瓜蔓長、此時憐汝夏畦忙、閑人未必無閑

課、親洗瓦盆移菊秧、

偶書

半晴半陰無定、嫩暑嫩涼互催、野服或單或袂、閑窗時閉時開、

六月三日、觀米人須密斯氏飛行二首

一聲火槍響、壯士上場初、馳騁離平地、騰騰躡太虛、風翻枯葉墜、雲隔片帆舒、只道人如鳥、安知鳥不如、勇夫膽如斗、慷慨試飛翔、倏忽蛇身曲、須臾鳥翼張、雲龍纔隱現、天馬暫騰驤、既罷長空碧、西林只夕陽、益田香遠、贈新鑄印譜、賦以爲謝、

想見高人篆學精，試刀佳凍遣閑情。
蘆簾捲盡晴窗下，兩眼如鷹不轉睛。

入梅無雨，溽暑如盛夏。

不知九淵底，何處懶龍潛。
觸石雲難出，隨車雨豈霑。
水枯池鯉露，土燥壁蝸粘。
厭見榴花色，煌煌添午炎。

又賦一絕

仲夏新秧綠色齊，田田水涸不成泥。
農人祈社無多願，只乞黃梅雨一犁。

勸農

勸農不與勸商同，農務可參天地功。
淡飲粗茶宜易

足，寒耕熱耨要期豐。
蕭條雞犬桑麻外，點綴豆瓜籬。
落中，自古庶人皆食力，告君永保此家風。

自詠

頽齡只講養生方，羨殺諸公膂力剛。
馬骨漸高因有病，鶴身元瘦豈無糧。
誰言老後年光促，却覺閑中日影長。
幸我趨朝堪拜跪，麪袍時惹御爐香。

憶土左楊梅事而賦

十市村在南海湄，楊梅佳品產于斯。
顆大核小多肌肉，諸楊不及此處奇。
黃梅時節梅子熟，便是楊梅亦熟時。
千林翳翳四時綠，葉間纍纍朱實垂。
村童健捷

獼猴似、聳身攀樹不知危、採入筠籃籃皆滿、十指悉
染濃胭脂、壯者肩挑步入市、市人此時方朶頤、由來
物多則價賤、數錢珍菓滿盤區、圓丸爛爛類龍眼、甘
露溥溥似荔枝、海南五月天漸熱、一咽乃覺冷沁脾、
芳鮮香味貴新摘、恨不可向遠方貽、鹽藏蜜煎有何
效、百方收貯皆徒爲、都門市上多遠物、百菓如山獨
無之、久哉鄉味不到口、悵望南天馳我思、欲誇鄉山
物產美、追憶往事賦新詩、勿道都人無知者、世間應
有子雲知、

競賣

侯伯之家皆舊族、傳來舊物滿筐篋、文具武具茗謙
具、雜糅書幅及畫幅、怕水怕火怕偷兒、深藏又怕飽
蠹腹、捧持不做輒損傷、出納未可委童僕、新興之家
競收藏、垂涎舊物傾橐囊、此時舊物價倍蓰、不如付
之競賣場、沽哉沽哉待善價、得金合有貨殖方、楚人
失之楚人得、一賣一買計最良、人之所好不脛走、不
知舊物歸誰手、我告買者善藏之、以時曝涼防腐朽、
舊物皆是參考資、博覽會場所宜有、出陳示人亦足
誇、縱曰新獲同世守、

雨中、賦詩遣况、

吾門常寂寂、此日雀堪羅、簾捲茶煙出、窗容樹影多、
壁間塵在杖、階下醱生鞦、幽興無人共、新詩獨自哦、
足疾

二豎與相親、聯綿涉數旬、馬瘡何可走、蠖屈豈忘伸、
空抱濟時志、徒傷憂國身、幸吾腰脚疾、未至累精神、

題畫觀音像

大士無定相、乃現女人姿、寶冠與綠帔、慈容何其慈、
菩薩面如月、普照無所遺、合十發大願、庶幾無畏施、

夏日書事

如年夏日豈言長、曝畫攤書不下堂、入座燕飛乘晝

寂、隔簾蝶舞覺風涼、頽齡誰咎應酬懶、要路我憐迎
送忙、一枕騰騰成偶睡、醒時檐角已斜陽、

觀蟻成行、有作、

累土作宮塵作樓、慕羶趁穢出而遊、暑天吾正貪酣
睡、莫向牀前學鬪牛、
交錯往來渾整齊、亦宜微物制鯨鯢、幾羣摧倒萬間
厦、一穴冲潰千丈隄、

桑杖歌

杖以御藏島所產桑樹造、謂此樹二千年外
物也、蓋老桑之材、直徑六尺幾寸、半徑三尺

幾寸、而木層之數、每寸六十、則三尺幾寸之
層數、可二千有餘、因知其爲二千年外物矣、
萩原氏囑良工製杖、贈余曰、壽桑之杖、請以
爲壽、乃以此詩言謝、

御藏島在我南洋、島中桑樹幾千章、桑之老者徑六
尺、已歷二千餘星霜、勿疑壽桑壽如此、筭出桑壽自
有方、木層之數卽年數、數之乃知非荒唐、島有良工
劉爲杖、宛然叩竹三尺長、上頭彎曲便把握、下端鐵
裹防損傷、舉以贈余意太厚、謂以壽桑祝壽康、老子
從此得老友、于山于水永徜徉、老桑比我多閱歷、吾

將與汝共行藏、扶危助險憑汝力、衰翁雖衰氣力强、
杖頭不許纖塵汗、手掌摩挲帶古香、日出之國多靈
木、夙聞暘谷生扶桑、

八月三日、抵那須園、

雨後門庭蘚色新、一泓池水碧粼粼、野花呈媚鳥聲
樂、似待那須園主人、

同月五日、卽舊曆七夕、見田家祭雙星有感、
黃昏燈火影熒熒、處處田家未掩扃、今日古風存者
少、村娘猶解拜雙星、

村莊雜賦、九首、

白雨忽傾盆，滔滔渠水奔。勿教入田去，恐動稻苗根。
村居苦多虫，夜夜就燈光。撲紙是何者，比蛾音響強。
木槿賤如草，花開人不奇。儻教無此樹，何樹可編籬。
我園竹樹幽，鶯語夏連秋。不抱遷喬志，憐渠亦隱流。
詩人聞見陋，只賞九春鶯。夏秋啼不歇，入耳盡佳聲。
亭亭針葉樹，一斷不抽芽。下有新苗茁，纖纖密似麻。
代木爲薪炭，豈無萌蘖生。細心須愛養，經歲茂林成。
大矣生生德，皇天雨露深。無人播種子，有此自然林。
寄語佃人輩，於焉養子孫。他年增戶口，卽我細川村。
園僕種雁來紅於一大盆，自吾園昇來，安之庭

上病中見之，喜而有作。

大盆盛肥土，培養雁來紅。花品非一類，葉色固不同。
其色紅黃紫，或有全青蔥。一葉非一色，點染工哉工。
經雨愈鮮麗，受日益玲瓏。各自競妍媚，燦爛映簾櫳。
對之娛心目，不覺百慮空。老懷歡悰少，况復臥病中。
老僕供此盆，謂欲慰衰翁。此花固可喜，最喜老僕忠。

十洲詩鈔卷二十五畢

十洲詩鈔卷二十六

細川潤潤叟 著

秋熱有感

勿謂秋陽熱如燬、勿貪冰塊冷沁齒、勿入山間浴溫
泉、勿向海澨沒潮水、勿耽酣飲吸碧筒、勿泛畫舫載
歌妓、人人各講消暑方、以我視之徒爲耳、方今戰雲
滿西天、砲火閃閃雜毒煙、血肉塗地無乾土、壯士忍
渴口無涎、工廠當暑不給假、操作安得休兩肩、閩人
亦爲看護婦、撫摩傷者夜不眠、諸君回頭想此事、何
忍消暑費金錢、縱令隘巷矮屋內、日午清風颯颯然、

詠牽牛花二首

紅暎出海上猶遲，露浥牽牛花一籬。雨過長空淨如拭，可無同色碧琉璃。

牽牛雖賤亦年華，撒子籬邊似撒沙。狂蔓縱橫吾最喜，攀松上竹悉開花。

自嘲

老境老方識，莫嘲慵更慵。得床常伏枕，出戶必支筇。病後吟情怯，閑中睡味濃。時於書卷裏，喜與古人逢。

九月十二三日雨，十四日雨止而翳，氣候頓冷，十六日氣候復熱，此夕賦詩紀事。

早久暑難退，雲霧忽不披。一朝天暗黑，小雨漸絲絲。三日雨不止，何處望秋曦。殘暑避三舍，陰氣冷侵肌。翻筐覓毛布，更欲呼酒卮。北窗閉戶牖，微風亦怯吹。方今稻未熟，平疇萬穗垂。冷氣或傷稼，農家皆顰眉。今夕覺驟熱，脫衣付女兒。未知幾十度，點火檢暑規。果近八十度，驟熱不足奇。以之補過冷，過冷彼一時。碧翁不傷稼，稽顙謝天慈。今歲猶去歲，上熟復奚疑。

二十九日頓冷

灑氣從何處，搖搖忽滿天。草頭凝作露，林杪散成煙。煩熱全然去，宿痾強半痊。袂衣方適體，我獨欲裝綿。

感秋二首

又是一年搖落時，駸駸物換且星移。風高門巷梧桐老，露冷庭階蟋蟀悲。身欠道腴同鶴瘦，腹無經笥似龜飢。自嘆近日才情減，徒誦少陵秋興詩。

飛騰憶我少年雄，雄氣消時世念空。素視文章同敝帚，肯將材質擬焦桐。數椽村墅宜朝退，半頃水田欣歲豐。蘭馥桂芳籬菊麗，秋人何必怨秋風。

十月十日，從小田原歸，路過大磯有感。

消暑尤宜大小磯，秋風一到客皆歸。連櫓別墅無人影，蛛網蝸涎滿板扉。

十一月三日，奉賀立太子禮成。

上德係元良，聖嗣居少陽。伏聞雷洊震，仰見日重光。典範沿新例，威儀由舊章。鴻基逾鞏固，休運倍隆昌。列祖貽謨訓，慈衷教義方。詩書常在側，師友不離傍。素備崇賢禮，渾無好樂荒。英姿尤瀟灑，大度更汪洋。淵廣龍潛躍，風高鶴遠翔。所祈絃誦外，視膳侍天

園中山茶花開

小春天氣似春暉，一樹山茶映竹扉。細細花香人未覺，游蜂抱蕊不曾飛。

見狂花

一樹山櫻落木傍，素英點點映斜陽。小春豈可無春色，喚汝爲狂不是狂。

負暄

不聞剝啄到柴門，愛日如烘好負暄。孰與衰翁同此況，破氈先已懶猫蹲。

焚香九首

世人衰朽後，往往失丹心。熟似伽楠木，老來爲水沈。有客貽香木，分之入博山。鼻端未參透，認得鷓鴣斑。沈檀多品類，用法要商量。小閣宜微馥，華堂貴美香。

點得星星火，生來縷縷雲。篆耶將籀也，不識是何文。裊裊一絲青，對之悅性靈。吾家無繡佛，只有楞伽經。坐久爐煙絕，香留几席中。吾齋容十笏，即是一薰籠。氤氳煙滿室，竟日繞吟身。自有冲融氣，如逢醞藉人。小室不褰簾，伽楠手自添。篆煙消已久，餘馥在鬚髯。晨興時一炷，稽首祝堯天。憶我朝參日，祥煙繞御前。

悟園有盆菊數十種，兒源三郎所培養也。花時往觀。

兒輩迎吾來倚欄，過重陽後未闌殘。盆多應減苔痕

十洲詩錄 卷二十六 四
綠花矮豈遮楓葉丹，午暖暹香風冉冉，曉晴添色露
團團，秋光不似春光促，付與詩人仔細看。

十一月二十七日，立太子禮成後宮中饗宴，潤
亦與焉，恭紀。

冊立禮成真樂哉，豐明殿上盛筵開，淋漓酒是攝州
酒，潑刺魚從韓海來，瑞氣元知遍寰宇，懽聲直欲動
樓臺，老臣何敢辭露醉，咫尺君王舉御杯。

二十九日，皇太子召臣等於霞關賜酒，
詔立皇儲已浹旬，離宮置酒賜群臣，聰明資質亶天
縱，學問工夫更日新，國有耆年成羽翼，世傳祖訓是

精神，愧吾衰朽陳何力，默禱穰穰福祿臻。

或贈杖，言阿里山所產硃砂根也，硃砂根俗稱

萬兩，戲賦一絕。

有客近從台嶋返，贈吾筇杖伴行吟，青銅一百何須
挂，隻手常携萬兩金。

菊花已衰，採之油炒，香味俱妙。

花色已衰香尚清，油煎上膳侑杯觥，騷人恐未知斯
味，秋菊只言殞落英。

咏菊

淵明采菊坐籬傍，未必按花泛酒觴，想與撫松同一

意、唯憐小草不凋霜、

寒菊

入冬霜霰過東籬、寒菊一叢開最遲、不羨秋花盆樣大、風摧雨打晚香萎、

送黑井悌次郎赴任於旅順

蔓草寒煙滿廢墟、開城已是十年餘、將軍今日應多暇、閉閣焚香好讀書、

輓大山公爵

無端老淚落頻頻、疾豎何爲奪舊臣、聞道蒼生呼福將、可知青史許完人、養成四境男兒勇、宣布兩朝

天子仁、治命村莊營兆域、拔山餘力闢荆榛、

老去將軍力養生、每逢官暇出門行、據鞍尤要驅馳便、減膳唯貪步履輕、一夜雲侵星斗暗、九霄風勁棟梁傾、仄聞屬纊傷心語、憾不逮看時局平、

歲晚餽遺

東舍西家互餽遺、年豐况又歲終時、珍禽入籠色璀璨、美菓滿籃光陸離、可識人情嫌寡薄、猶看世俗未澆漓、勸君鼎肉休漫賜、僕僕寧無亟拜疲、

丁巳新年

休言尙虛禮、戚友互相過、日照旗章麗、風傳笑語多、

學童皆著袴，閨女總簪羅，時聽鞀鼓，三河萬歲歌。

近日少女子束羅片
爲首飾，第六句故及。

新年自述

曾愁蒲柳望秋枯，擁腫幾年成朽株，自憫蠶眠將作繭，誰言馬老不迷途，寒中手足如龜縮，病後形容似鶴癯，賴有雙眸光一寸，溫書尙冀補東隅。

應囑作書，因有此作。

少小事塗抹，不欲以書名，豈料乞書者，戶屢殆將盈，黽俛塞其責，峻拒非人情，本是緒餘業，巧拙非所爭，磨墨作數幅，行草信筆成，素知無進境，祇恐手腕生。

暮景

霞抹長空落照餘，出門信脚老懷舒，林梢點點歸鴉影，也似吾孫始學書。

曉寒

凜凜寒威逼臥牀，料知窗外有嚴霜，捲衾試吐口中氣，一道白煙三尺長。

吾園大櫺，蓋三四百年物也，年來生意略盡，乃命伐之。

吾園有大櫺，已歷數百年，蒼蒼苔蘚合，裊裊藤蘿纏，何年風力暴，折去老樹顛，雨水所滲透，樹身不得全。

雖然未悉朽，其材安可捐。鋸之爲片板，尙可易酒錢。
伐枝爲薪木，亦足起炊煙。伐之非得已，恰遇搖落天。
先期戒園僕，衆力冀勿愆。長鋸齒須鑷，巨斧刃須研。
枝條以序斷，更掘根株邊。工程涉數日，始得休兩肩。
黑鴉無所宿，黃鳥無所遷。雲氣不搖曳，風聲徒颯然。
園林俄落莫，徘徊我亦憐。夏日無美蔭，何由聽鳴蟬。
吾將揀佳樹，俟時移于焉。譬彼大官闕，補任選後賢。

寄題櫻井氏有子山房

靜士置身邱壑間，世傳不失有兒山。空庭今日箒痕
直，怪石多年苔色斑。爲引清風開竹逕，要招明月入

梅關，他年更欲登高賦，容易輪車可往還。竹逕梅關，俱
爲園中景勝。
久矣此間營菟裘，經來一百卅春秋。櫻林密密閑雲
宿，竹塢深深倦鳥投。漸見名人爭賦詠，足知累世好
風流。憑君試問蒼苔上，諸老杖痕留不留。櫻林竹塢，亦
園中景勝。○

柴栗山篠小竹齋藤拙
堂皆來過，末段故及。

感冒伏枕，病間有作。

慎疾聖之訓，養生吾豈忘。冬天有公事，出戶觸風霜。
由此得寒疾，勿道欠豫防。大氣方凜冽，刺人似鋒鋸。
尖風自鼻入，鼻涕如綆長。拭之又拭之，拭拭將不遑。
朝來擁被臥，竟日不去牀。驅寒宜取暖，湯婆獨專房。

吾病在皮膜，猶未入膏肓，勿妄招醫士，又服葛根湯，
吻燥時劈橘，舌苦又舐糖，只有雙弓米，可以充飢腸，
徐徐開腠理，合是萬全方，極力催發汗，或恐元氣傷，

盆中蠟梅方開

孰向枝頭綴蠟丸，倒開花色欲窺難，幸吾小疾二三日，
移得瓦盆敬枕看，

病愈試步

小疾霍然愈，出門唯信脚，快哉弄午晴，行飯非行藥，

書齋壁示客

飯後朝昏携杖行，優遊尙欲保餘生，怕他久坐閑談

客，不使斯翁了日程，

書況

老覺寒威勁，一年甚一年，壁愁飢鼠鑿，窗怕稚孫穿，
爐要深埋炭，衣宜厚絮綿，未能停火食，安得學神仙，

客說苦寒，因作長句示之，

東京今年有厚冰，比似昨年寒氣增，庭前鷄犬皆瑟
縮，街上人馬共凌兢，昨年冬暖多疾病，今歲冬冷方
得正，風霜凜冽即其常，瑞雪三寸亦可慶，我有密室
可避風，家貯烏薪爐火紅，首蒙氈帽足穿襪，芋粥三
椀腹不空，况復年年民食足，萬竈炊煙見歲豐，鞶鞶

之下無飢凍，可不稽首謝碧翁，北地苦寒君知否，積雪埋車車不通，酒漿爲冰卵如石，比諸都門同不同，

路上

路上輪蹄鬧，加之自走車，今朝風力軟，漠漠颺塵沙，

書事

年來習懶掩柴荆，聽得今朝剝啄聲，孰使老夫書額字，隣街新建學堂成，

警子

誰能飲水不思源，一飯勿忘君父恩，世德貞醇爲舊族，家風清白是名門，人間自有山林福，物望無如道

義尊，詩社應酬吾已倦，短篇猶要示兒孫，

櫻井兒山，寄贈磁杯，狀如短筒，中有小杯，其上

有蓋，注溫酒於杯，注溫湯於筒，掩之以蓋，酒可

不冷，名曰暖杯，

套杯加蓋狀如筒，湯氣升騰類火烘，白石琢磨尤滑澤，素梅彫刻又精工，徐徐入口歡無極，數數濡唇興不窮，痛飲讀騷非我事，閑人傾酒勿匆匆，白磁皎潔，上刻梅花，

三月九日，雷雨

輕寒輕暖仲春天，滿地萌芽已勃然，雷震一聲尤有力，龍孫露角蕨張拳，

觀荒木寬畝遺墨

寬翁家數大，世史莫與爭，衆善悉皆有一，長安可名，
宇宙萬物象，一睨信手成，家學之所致，天才尤堪驚，
巨幀描道釋，彷彿高古情，細筆描士女，依稀笑語聲，
松樹無霜色，梅花帶月明，海水波波動，草蟲個個鳴，
古今供斟酌，南北素合并，布彩窮絢爛，用筆却縱橫，
幅幅各有妙，未遑一一評，傑作藏天府，吁嗟翁亦榮，
命園僕，移植蒲公英於磁盆，因有此作，

蒲公英茁竹籬傍，移植磁盆入草堂，不蒔洋花誇俗
艷，栽將野卉當年光，

早起步街上所見

散步尤宜趁早晨，一條街路未揚塵，先吾疾步者誰
子，無乃沿門送渾人，

輓竹添井井二首

儒林又失老先生，往聖微言寢不明，最惜圓珠經一
部，會箋新著未全成，君作論語會箋而未成

岳父文章並罕倫，如君筆力亦千鈞，近今後進皆新
學，藝苑那邊求替人，岳父謂木下韓村

生日小宴賦此詩以示諸子

春日已載陽，花柳弄風光，誕辰招親戚，子婦上壽觴，

嗟吾失怙恃、風樹久感傷、嫌享過分福、祝嘏不敢當、
老妻比我少、早起掃祠堂、素几陳蔬菓、瓦瓶陳酒漿、
凡此餽餘物、要與汝輩嘗、健啖勿傷胃、連飲勿腐腸、
兒孫繞膝戲、絮語不厭長、勿謂無豪興、豪興不可常、
儉樸守家法、冀令家道昌、須記葩經語、曰好樂無荒、

那須路上

剪剪東風淡淡雲、櫻林一路客成羣、飛花亂點藍衫
上、便是天然絞纈紋、

展大山公爵墓

官道左折如砥平、板屋高聳八九楹、此是赫山將軍

墓、盛砂作邱草不生、左右幄舍陳儀物、碑面大書官
姓名、想見國葬恩禮厚、客冬于此簇簪纓、將軍曾膺
閩外任、不動聲色大功成、生榮死哀聞其語、將軍雖
死死亦榮、

過乃木神社

故宅遺墳兩斷腸、栗林過客拜祠堂、未知毅魄戀何
處、應是桃山寢廟傍、

烏森花開、遠近來觀、設店賣酒、醉客滿路、

一望櫻花發、東風翻酒旗、俚歌猶助興、村女亦多姿、
正是暄和候、豈非操作時、農家須食力、戒汝勿荒嬉、

十洲詩錄 卷二十六
出遊

背手出門去，吾心便豁然。眼前途坦坦，脚下草芊芊。鶯啼有何樂，花容爲孰妍。年光須報答，未必句皆圓。

園外有古松

長松百尺上凌雲，免得當年野火焚。新墾田園無舊物，慙慙匠氏勿加斤。

有鳥來栖林中，窺之毛羽甚美，而不知其名也。一聲格磔伴孤吟，何物來栖修竹林。飲啄閑閑不驚去，主人無意養珍禽。

忽聞躍鯉，蓋雨兆也。

墟煙漠漠罩朝曦，昨夜春溫透被池。坐久水軒聞躍鯉，莫非山雨欲來時。

園丁掘筍，肥嫩異常。

曾種江南竹數竿，年添稚子喜平安。老饕不覺涎三尺，一尺錦綳泥未乾。

偶見野草著花淡紫色，葢黃色葉尖長似苦蕒。野花零碎逞芳姿，草豈無名我未知。八十餘年成底事，趨庭早已學夫詩。

大圓寺展秋帆先生墓

老樹陰中聽鳥聲，何人來此掃遺塋。莫言苔蘚無情

物未肯上碑侵姓名

郊行

四顧風光好，暄和九夏初。修篁圍老屋，茂柳拂清渠。
縱不仁人里，堪爲靜者居。先賢吾尙記，往往帶經鋤。

命園丁易盆樹宿土

半尺瓦盆裏，矮樹年年榮。樹根漸生長，糾纏似織成。
土壤力將盡，不足助發生。若不換宿土，恐見枯枝橫。
換土宜初夏，暄和且牢晴。肥泥去瓦礫，兩手于盆盛。
拔樹又移樹，慎勿損芽萌。植畢灌勺水，安頓勿令傾。
一齒脫去，因有此作。

人生本非金石固，頭童齒豁是常數。咀嚼不啻易磨
磷，經久自然多朽蠹。老來茹柔且吐剛，戰兢常怕齒
神怒。無如齒根漸不牢，忽然脫去不可駐。嗟我勞汝
八十年，曾爲瓠犀豈忘故。况復遺體宜善藏，吾將爲
汝築齒墓。

吾園口占

稚筍日來高過籬，山園莓熟豆肥時。膳羞更要新生
卵，勿使家鷄母子飢。

那須園池上，杜鵑花正開

清渠水入一池平，紅杜鵑花石上橫。鏡面明明美人

影勿教風盛浪紋生、

偶見翡翠栖樹上

何來翡翠立松枝、未肯俄飛似俯窺、不許啣將隻鱗去、養魚池是放生池、

憫農

野人吾憫汝、自奉一何廉、砥礪剝桑斧、研磨芟麥鎌、脛汗泥滑滑、背炙日炎炎、辛苦非無報、天恩雨露霑、

六月十五日、雷雨、

少女風先到、雨來如亂麻、入池沈躍鯉、打草禁鳴蛙、箭激無由避、珠跳不可遮、倚欄呼一快、恍對水簾斜、

上烏森

四顧平平霽色開、川流如帶樹如苔、野州山嶽皆邱垤、富士淺間安在哉、

縱筆

乘興呼盃興倍高、酒邊時復弄枯毫、老來量減不成醉、唯有狂吟足自豪、

老當益壯馬援語也、余反其意曰老當益懶、鑄此語於印、賦詩解嘲、

自是人生有盛衰、暮年誰不負心期、伏波曾道老當壯、無奈壺頭病困時、

夏日雜賦十首

飯後便攤飯，醒時日已斜。倦眸無著處，起數建蘭芽。
幽棲在城市，而似野人家。庭草多風露，數莖桔梗花。
驟晴雲未散，溽熱熱於湯。愛聽蛙呼雨，雨來安不涼。
何以消長晝，案頭有道經。博山香一炷，危坐誦黃庭。
休從文字覓，文字本非禪。善慧亦饒舌，心王銘一篇。
靜坐不能久，時時入黑甜。自修無所得，徒手首楞嚴。
呼僮洗桐葉，剪除冗雜枝。讀書多數紙，日夕欲昏遲。
幸哉梅雨歇，熟麥免生芽。趁此暫晴際，吾其採晚茶。
行人行拭汗，只見兩眉顰。撒水非時雨，安能弭路塵。

故人捐世久，遺像立街頭。怕此炎炎日，熔銅銅亦流。
苦熱

天地洪爐似，何方免鬱蒸。酒樓多設浴，肉店亦藏冰。
蘆柄紀伊扇，竹絲岐阜燈。幸哉吾井冽，勿斷轆轤繩。
今夏命園僕移植江南竹，數竿於吾園，作歌紀事。

吾園地勢未窘蹙，要使繁陰繞草屋。此君年年有醉
時，欲趁此時移巨竹。凡百之物有陰陽，自非陰性不
孕育。種竹多雌林，乃豐籜龍肥肉勝於肉。園僕聞之
前致辭，公言有理，豈不服。未知何以別雌雄，勿惜祕

訣傳老僕，主人笑曰：汝未知雌雄之別，不須疑，試見竹節抽竹枝，枝有隻枝有雙枝，奇數耦數便陰陽，隻枝爲雄，雙爲雌，果依此法作竹塢，竹子竹孫必蕃滋，老饜飽喫不能盡，南風吹作綠參差。

在那須數日，書以報家人。

勿言秋立暑猶殘，夜夜新涼夢亦安，每到曉鷄三唱後，添將薄被護輕寒。

題畫草蟲

瓜花多被蜂針破，豆蔓數看螳斧橫，扇面只宜描蟋蟀，依稀紙上聽秋聲。

園中銀杏樹，老幹半朽，枝葉不繁，蓋數百年外物也。

一株銀杏草堂傍，樹上生癭似乳房，不許主翁誇老壽，晨昏對個丈人行。

偶賦

世間猶自怕秋陽，孰識那須村墅涼，面面軒窗皆不鎖，午風吹送稻花香。

那須園雜賦，次高青邱郊墅雜賦韻，十六首，買得一區地，幾年爲主翁，踈籬將樹補，曲沼與渠通，竹帶瀼瀼露，松生稷稷風，倚欄多遠意，何必入山中。

荒蕪經墾闢，地價每年增。村學聚童子，野菴迎老僧。
曉耕男荷篠，夜織婦挑燈。我亦除庭草，休言百不能。
地僻無車馬，風來不捲沙。圃瓜多結實，籬槿盛開花。
遠樹聞樵斧，高帘認酒家。日程唯覓句，聊以答年華。
讀書嫌久坐，把杖出門行。儉素嘉村俗，優遊忘世情。
殘炎隨水去，暮色自山生。父老相迎揖，何妨識我名。
農人多識面，笑語又相親。坦率何知禮，勤勞未免貧。
携籃採桑女，負帛賣絲人。若無衣食計，安得保其身。
非營高士宅，欲作野人居。草棘未全絕，桑麻安有餘。
造林栖宿鳥，鑿沼養游魚。松下宜觀稼，把茅將結廬。

四郊多瀨氣，况復乍涼時。但見田連圃，有如水滿陂。
堤遙牛過緩，天濶鳥翔遲。逼窄城中客，惜夫渾不知。
凭檻觀魚樂，無心垂釣竿。草青波共動，萍綠露何乾。
桐屐不思著，芸編亦懶看。傍人怪枯寂，有句未吟安。
縱目那須野，田園一樣青。崇墳多涕淚，老樹有精靈。
雨過蟲聲濕，雲歸龍氣腥。午眠消午熱，風到被吹醒。
只種槿成藩，豈將磚築垣。厭聞新紙報，喜納老農言。
縱有蜩螿沸，終無鼓笛喧。今年吾自幸，三度到斯園。
池塘何厭小，江海有風波。叩戶雜賓少，灌園幽事多。
青山相對坐，白日自經過。聞說西歐地，三年未止戈。

昔日無溝澮，而今水拍塘。自從初墾闢，已閱幾星霜。
已設班田制，更傳種樹方。印南翁有力，世世不容忘。
一水繞村遠，群山入座遙。雲籠松疊疊，風動竹蕭蕭。
小圃蔬堪摘，疎林木可樵。香魚聞上釣，欲過箬川橋。
飯罷輒行飯，林隈又水隈。俗情何處去，詩興忽相催。
有竹多佳竹，無梅不野梅。村厖馴已久，見我遠追陪。
不用策扶老，孤吟行掉頭。平郊秋色淡，遠嶺暮煙愁。
萬象皆堪領，一身無所求。眼前多異境，世豈有瀛洲。
人生要衣食，問舍又求田。耘耨方成粒，蠶繅易得錢。
每秋皆上熟，是歲必豐年。幾隊村男女，踏歌社鼓邊。

種白萩花於庭，因有此作。

萩俗字，然慣用已久，今從之。

萩花移得兩三叢，未向葉間栖草蟲。細蕊繽紛含玉露，纖枝袅娜舞金風。貞姿如在清霜下，潔質尤宜皎月中。爲惜詩人無舊詠，狂吟衝吻不求工。

吾園老松枯

老松多姿態，有如高士標。盤桓不能去，風來聽咸韶。
今夏旱太甚，土裂草木焦。歲寒後凋樹，終然不免凋。
園僕來告我，鋸斷請雇樵。嗟吾所愛樹，安忍作薪燒。
思量生一計，其下種凌霄。攀緣枝葉茂，花開枯樹條。

小田原散步

出門無儔侶，任脚獨行行。行出街衢去，縱目可悅生。
望山心共遠，臨水意俱平。地曠行雲緩，天高飛鳥輕。
煙波開胸豁，灑氣入懷清。祠樹不知歲，野花何記名。
萬物皆自得，靜觀得其情。蟲吟聲非一，豈是不平鳴。

九月卅日，值陰曆中秋，夜大風雨，作詩紀變。

丁巳九月三十日，良夜無如月離畢，此日終日雨滂
沱，雲氣滿天天似漆，夜半大風東北來，直欲掀翻環
堵室，拔樹飛瓦倒垣牆，河水倒流海水溢，潮勢如山
安可防，縮首束手欲戰慄，老幼婦女化爲魚，幸而得
免者劣十一，廬舍淹沒果幾何，人畜死傷未明悉，吏

卒勿遽事救災，奔波何厭泥濘膝，富者出財壯者力，
飢者與食寒者衣，病者傷者與藥囊，幼者亦復與梨
栗，侍臣承命問疾苦，皇仁如天賜恩卹，堯水湯旱自
古有，聖德消災未可必。

偶書

年來戰勝未曾肥，搔首徒嗟減帽圍，豈翅苦吟人善
瘦，秋風掠髻髻絲稀。

或索題秋帆先生壯年畫像，爲賦一律。

名門又見出奇才，意氣軒昂度量恢，欲使海關全守
備，甘傾囊橐散賞財，飛丸掠草草皆靡，爆彈裂雲雲

亦頽、陳迹茫茫何處在、惟從遺像望風裁、

夜賦

晚來開戶見星光、夜氣漸凝將作霜、枕上忽疑微雨過、不知飄葉入虛廊、

抵那須見遠峰戴雪

方今紅葉滿山坡、乃見峰尖失黛螺、八十老人尤怕雪、亦云爲瑞不宜多、結句末五字、羅隱全句、

步池上

鏡樣碧池塵不飛、喜看魚子近來肥、柳文妙處今方悟、恰似空游無所依、

散策途上偶成

怪從籬落聽鴉鴉、知有厖兒尙未馴、十五年來村墅在、不容認我做生人、

晚眺

西山已見匿斜曛、翠壁丹崖漸不分、一道霞光猶未斂、入雲方作鍍金雲、

杜詩有林茂鳥有歸水深魚知聚二句、恰如爲我那須園賦者、乃以二句首字爲韻、賦五古二首、以廣其意、

松柏杉檜櫛、繞屋以成林、萬木皆蒼翠、四時常鬱森、

乃此茂林茂，有如深山深，孰與樂斯境，和鳴葉底禽。
我園池一泓，活水非死水，深處泛蘋藻，淺處生蓀芷。
斯中放魚苗，今爲盈尺鯉，瞿曇戒殺生，何曾動食指。
今年大風，楓葉不足觀，而吾園之楓甚美，喜而賦。
秋色未殘晴色開，園林一望錦雲堆，都門何處無楓樹，
霜葉滿枝如撒灰。

晴日曝盆花

紅芽漸展千年木，朱實方垂百兩金，好與盆花同向日，
冬溫亭午透衣深。

朱蕉，俗稱千年木。

歲晚自述

今歲亦云莫，重裘禦北風，豎衰無寸效，用短有全功。
靜士知三樂，躁人嘆五窮，癡聾君勿笑，恰好作家翁。
戊午新年，感冒伏枕，有客遺蠟梅數枝，插之備前窯花瓶，瓶有芝麻斑，蓋窯變也。

蠟梅見餉兩三條，插入花尊伴寂寥，樸陋小齋宜雅製，
芝麻斑滿備前窯。

新年上膳者，多遠近土產，皆親朋所餽也，爲賦二律。

親朋餽物賀新年，豈得不垂三尺涎，菜蔬莫如名古

十洲詩鈔 卷二十六 二十二
屋、葱根尤好下仁田、蠣房金澤多佳產、蠟子瓊津有
祕傳、東海亦非無異味、紫苔一束價千錢、

餽遣成堆滿案前、晨昏一飽不須錢、毛山繡羽羅羅
碎、湘海華臍入網鮮、新獲生魚鹽豉蘸、久藏乾餅菜
油煎、放翁薄福吾憐汝、歲晚盤尊嘆索然、
時閱放翁集、有歲晚盤尊

索然戲書詩、末段故及、

豐前人贈山藥

老子患痰久不痊、無端惹得故人憐、芒鞋踏破豐山
雪、手把長錢刷玉延、

下總人贈鯉

金鱗六六照筠籃、割肉作羹肥且甘、最喜數杯增乳

汁、吾家媳婦近生男、

相傳、產婦食鯉、乳汁多出、

病起、志喜、二首、

腰脚輕時屐亦輕、風和日暖試閑行、好將全力揮筇
竹、要聽鏗然憂石聲、

朝來沐髮覺身輕、拋却藥囊呼酒觥、不獨家人多笑
語、繞檐烏雀亦歡聲、

祈年祭日、有感而作、

瑞穗嘉名不偶然、歷朝宸念在祈年、年來米貴憂艱
食、十雨五風寧可愆、

雪後寒甚

勿言吾屋不多寬，容膝由來覺最安。廣廈萬間風似水，雪天何以可防寒。

三月三日，女兒陳春勝，供酒食，謂之雛祭，明治中興後，廢五節日，而此風如故，乃作雛祭歌。

誰將春勝喚爲雛，粉面玉眼美且都。冠劍衣裳無不具，分明男女居室圖。三月三日好時節，家家女兒競陳設。唐花有桃可插瓶，白酒紅餅俱豐潔。淨掃一室招女伴，喃喃交語極惻款。共喫點心皆餞餘，脉脉情長覺日短。游戲猶見風俗淳，佳節相慶且相親。太平

樂事宜如此，錦屏圍繞玉階春。春勝未知何人像，想非尋常泥塑人。對之能無羹牆感，櫻橘依稀似紫宸。三月十一日，天龍艦進水。

忽看鷓首素波揚，萬口歡呼恰若狂。武備固宜全守國，艦型勿道只巡洋。誰歟慘淡勞籌畫，幾日周詳了蟻裝。運用在人人最重，由來駿馬待王良。

咏鷓二首

托身筠籠裏，飲啄不知飢。百結何須耻，宛然斑爛衣。鷓聲非不好，未可比鶯啼。採卵助家計，何曾讓母鷄。

題畫龍二首

鱗鬣留何處、人家屏障間、真龍吾幸見、鳳闕拜天顏、

盱衡談政事、又不喜爲農、世少躬耕者、那邊求臥龍、

題畫虎二首、

搏噬爪牙利、宛乎豺與狼、豺狼寧有此、遍體具文章、
文章縱炳耀、未足以爲奇、舉世多羊質、全身總虎皮、

日過吾園

公餘日日過村莊、節屆春分花事忙、何樹可移何樹
接、好呼園僕共商量、

伊丹人、以三月二十四日、爲橋本香坡、修贈位

報告祭、先此山中靜逸、亦有此事、追憶往事、賦

古風一篇、

我昔少壯游瓊津、瓊津乃在西海濱、繁華雖足娛估
客、我輩書生孰與親、下交幸有忘年友、投合豈非文
字因、寶授庵中會幾度、蔬筍侑酒酒千巡、吞酒吐詩
聊自快、咳唾成珠未必珍、歡樂不極人易散、本是東
西南北人、離合傷心況生死、每聞凶耗淚沾巾、四十
餘年真一瞬、前歡歷歷入夢頻、當年二老俱放浪、全
是翰墨場中身、天恩今日賜追賞、始知草莽有忠
臣、

吾園櫻樹漸長，着花亦繁，喜而有作。

年年歲歲花相似，見來此語未全是。木有榮悴素不同，花有疎密不同美。想吾曾買一尺苗，揮鍤移植村園裏。年年生長自成林，花開有期計日俟。蓓蕾萬點漸漸肥，春風果吹春雲起。樹樹已壯未爲老，每見年年花倍蓰。

花時口占十二首

自祭花神已幾時，富山有個淺間祠。寄言世上觀櫻客，望拜勿忘開也姬。

羣羣裙屐萬花間，笑語聲中多醉顏。憶起歌仙歌一

首，春心今日孰能閑。

冉冉東風冷鐵鞭，據鞍吟就勿來篇。落花方似藍關雪，不怪將軍馬不前。

三宿平生未戀桑，高僧猶自惜春光。區區所願無多子，埋骨花陰骨亦香。

用僧西行歌意

黃昏猶未問歸程，投宿今宵欲傍櫻。只怕滿身風露冷，與花俱睡夢難成。

廣平薩州歌意

斫樹誰書十字詩，有如隱語費尋思。行宮此日天顏喜，除却近臣渾不知。

畫師於畫貴精專，不要徒貪脂粉妍。借問寫櫻誰妙

手、豈非花隱與花顛、

首藤花隱、三熊花顛、

單重花瓣競春光、指數原來恐未能、櫻品一書猶未盡、何人訂補繼松岡、

松岡元達著櫻品

歷世 天皇御愛花、殿前一樹映朝霞、小臣祇惜無西幸、獨使宮官賞歲華、

君臣偕樂太平天、御苑每春春色妍、日夕何愁香雪冷、花陰設席賜三鞭、

勅停御會是何因、惻惻 皇情見至仁、今日歐洲兵禍慘、不容獨享太平春、

今茲四月、停觀櫻御會

簇簇香雲映夕暉、此時誰不惜芳菲、樹陰休繫游人

馬、一掣輒看花亂飛、

用俚歌意

游春

大塊由來有至文、眼前春物共欣欣、樓臺曲曲多香雪、羅綺羣羣帶暖雲、聖代皇恩元浩蕩、太平和氣自氤氳、花間笑語聲相接、縱是喧囂不厭聞、

那須園有梅、下枝之花白、上枝之花淡紅、蓋接枝也、

庭上一株梅、紅紅白白開、接枝痕不見、古幹帶蒼苔、園中稚松、多枯死者、詩以紀異、

去歲少雨雪、奇寒連數宵、驚見那須園、枯死萬松苗、

松苗如草茁，蟲蟲勢干霄。滿目蒼翠色，恰如遇火焦。
吾呼園丁告，枯者皆可樵。奇寒不常有，生者必後凋。
年年松子落，皇天雨露饒。能令踈者密，吾園未蕭條。

所見

淡淡墟煙接翠微，春郊無處不芳菲。女兒解摘雞腸菜，未識林中藥草肥。

吾園藤花

愛此老藤樹，托根經幾年。潛蛟常曲體，健鶴正張拳。
燦爛非凡艷，飄飄覺倍妍。仰瞻紫瓔珞，彷彿對金仙。

行圃

樹間移步步遲遲，新綠陰成萬朵垂。慧眼幼孫先認得，阿翁衫袖有蜚蠊。

4
21

十洲詩鈔卷二十六畢

十洲詩鈔
卷二十六
二十

終